



Program da lavur 2020

Digitalisaziun

La PSR vul era quest onn metter l'accent sin la digitalisaziun. L'entschatta è dada, ma blers projects ed ideas spetgan anc sin la realisaziun, era sch'in u l'auter pass principal en direcziun datas libras rumantschas è gia fatg. La PSR vul restar attenta al svilup en questa dumonda e manar vinavant quest accent per l'onn 2020. En spezial munta quai era da sa participar a la discussiun en il chantun Grischun cun il program da digitalisaziun, nua che nus avain prendì posiziun per resguardar la cultura e lingua. Il 2020 vegn quest program discutà e finalisà da las instituziuns chantunalas.

Strategia rumantscha da la Lia Rumantscha

Suenter ils 100 onns vegni temp da guardar enavant. La Lia Rumantscha ha dà en consultaziun ina strategia, e la PSR vul sa participar a questa discussiun. Per la radunanza da delegads da l'october 2020 è planisà da finalisar questa strategia. La PSR vegn a contribuir a questa strategia cun atgnas ideas e propostas e vegn a metter il focus sin prioritads clerhas ed a integrar las instituziuns communalas, chantunalas e federalas en la lavur per il rumantsch.

L'aquari rumantsch

Nua èn tut las giuvnas Rumantschas ed ils giuvens Rumantschs? Sparpagliads per la Svizra ed il mund enturn. Cun l'aquari vulesch la PSR inizialisar ina rait da contact rumantscha. Tgi che ha in'idea per in project e dovra per in temp definì in artist, ina economa u insatgi cun in talent d'organisaziun d'events (be per numnar trais da millis pussaivladads) po nizzegiar la rait da contact per chattar mauns e chaus rumantschs. La rait duai facilitar da restar en contact u chattar novs contacts cun personas ch'èn motivadas da s'engaschar per il rumantsch, e da chattar collavuratur/as. La PSR vegn regularmain ad organisar sentupadas e lavuratori per facilitar ideas, projects e contacts.

...e bler dapli. Ils ultims onns han mussà che las ideas naschan e sa sviluppan da cuntin. Per avair avunda temp da focusar sin quests trais puncts impurtants na vulain nus betg instradar in quart u tschintgavel punct da program gia uss, ma laschar avert la glista per in u l'auter project a curta vista. E natiralmain avain nus la lavur da mintgadi che cuntinescha: medias e La Quotidiana | contacts cun uniuns | represchentanza a las sesidas dal cussegl ed a la radunanza da delegads da la Lia Rumantscha | lavur da medias | politica da linguas.